

Dat kannst' mi glöven - Plattdeutsche Andachten

Montag bis Freitag, 14.15 Uhr (NDR 1 Niedersachsen)

11. April bis 14. April 2023 - De Kiek in d' Himmel-Dag

Von Marion Steinhorst-Coordes, Pastorin aus Uplengen-Remels

Von kleinen Osterwundern im Alltag erzählt Pastorin Marion Steinhorst-Coordes aus Uplengen-Remels in Ostfriesland. Ob beim Eierbikkern an der Fleischtheke oder im Altenheim. Überall erlebt sie Hoffnungsvolles, Erfreuliches und Stärkendes. Und der "Schau in den Himmel-Tag" tut auch mal gut.



Marion Steinhorst-Coordes

Redaktion:
Anita Christians-Albrecht
Pastorin und Beauftragte für Alten-
seelsorge in der hannoverschen
Landeskirche

Veröffentlichung:
Evangelische Kirche im NDR
Redaktion Hannover
Knochenhauerstr. 38-40
30159 Hannover
Tel. (0511) 32 76 21
www.ndr.de/kirche

Dieses Manuskript ist urheberrechtlich geschützt und darf nur für private Zwecke des Empfängers benutzt werden. Jede andere Verwendung (z.B. Mitteilung, Vortrag oder Aufführung in der Öffentlichkeit, Vervielfältigung, Bearbeitung, Übersetzung) ist nur mit Zustimmung der Ev. Kirche im NDR zulässig. Die Verwendung für Rundfunkzwecke bedarf der Genehmigung des NDR.

Dingsdag, 11. April 2023 - Eierbikkern

Hest' ok noch Ostereier over? Denn nehm eben twee un bikkje de an'nanner. Ik maak dat hier in't Studio nu ok. Aaah ... kött. So ist dat. Een is kött - un een blifft heel. Een hett 'n dicken Schill un een 'n dünnen. Un wo is dat bi di? Hest du 'n dicken Schill un geihst so fell neet kött? Of hest du 'n dünnen. Un wenn di een utlacht, wenn di een mobbt, wenn di een oversücht, wenn du Noot hest vör Krieg un Elend - klitz - kött. Dat is denn net, as wenn dor een an dien Hart bikkjert un denn hest du dor 'n Schöör in - un dat deit so seer. Denn kannst' neet mehr lachen, neet mehr hopen, neet mehr glöven. Dorum hett Gott dat sülms up sük nohmen, dat Köttgahn. In Jesus. An Karfreedag an't Krüz. Kiek, hett he seggt. Ik bün ok kött gahn, ik bün doot. Dat ist dat Schlimmste. Doot gahn. Du sülms - of de, de du leev hest. Denn is dat all ut un kött. Is dat neet! Dorum hebben wi net de letzt Dagen Oostern fiert. Dat, wat kött is, maakt Gott heel. All uns Noot, all uns Schören - dat is neet dat letzte. An't End maakt Gott all dat Kötte weer heel. Ok dat, wat bi uns up den Karkhoffen liggt un begraven is, dat maakt Gott weer heel. So, as Jesus ok weer heel worn is, upstahn is van d' Doot. Disse Ei is kött. Bi so'n Ei maakt dat nix. De puul ik nu of un mit 'n bietje Solt schmeckt dat allerbest. Gifft mi dat neei Kraft.

Mittweek, 12. April 2023 - Frau B. word 80

Se wuur 80, man nah Fiern wass hör heel neet taumaut. Vör körten was hör Mann stürven. Denn weer se sülms ok noch fallen un haar sük'n Been broken. Nu kunn se sük neet mehr alleen helpen. Kinner haarn se neet un Verwandten weern wiet weg. Vör'n poor Johr weern se hierher trukken, haarn sük n' Huuske köfft un weern dor mit'nanner old worrn. Wat wassen dat moje Johren west. Mit hör Mann, in dat Huuske. Un wat haarn se 'n Glück mit hör Nahberskup hat. Wo faak haarn se abends bi'nanner seten. Man nu weer se hier in't Altenheim. Huus weer verköfft. Un nu de 80ste fiern? Nee, se much dor heel neet an denken. De Daag kwamm. De Lüüd van't Heim haarn Luftballons an hör Döör maakt - man se haar woll brullen kunnt. Un do gung de Dör open - un twee Nahbers kwammen rin. Du, wi wulln di woll ofhalen. Wi wulln dien Geburstdaag fiern - bi uns. Un so kwamm dat do ok. De Nahbers haarn Kook baakt mit Kersen drup, un Bowle gaff dat ok. Un all weern se dor. De heele Nahberskup weer dor tau Tee drinken, galeern, proten un singen. Dies ist der Tag, den der HERR macht. Un neet bloot de Dag, abends gung dat noch wieder! As se doch, nu geiht dat weer up d' Heim an, do hebben se hör in't Rullstauhl een Huus wieder schoven, nah de anner Nahber hen - un dor wurr de Grill ansmeten! Um half elven hebben se hör eerst weer torügg brocht. Dat was de mooiste Geburstadag in hör heele Leven.

Dünnerdag, 13. April 2023 - Wurst koopen

Ik haar geern wat van de Leverwurst, sä ik an d' Fleeschtheke an de jung Verkäuferin. Groff of fien? Groff. Se schnitt dor 'n Stück van of. De is obber ok lekker, strahlt se mi an. Un dit hier - ok heel watt besünners. Se tikkert mit d' Mest up de kookt Schink. De schmekkt ok ohn Broot, lacht se. Ja, denn man fiev Schieven dorvan. Un de dröögt Schink... dor dürst neet bi anfangen. Un se langt mi 'n Dobbelke hen tau probeern. Un so geiht dat wieder - un ik probeer ... un ik koop. Ik koop neet bloot wegen dat lekker Reef. Nee, ik koop wegen de Verkäuferin. Ik weet neet, of se wat van Jesus weet.

Man ik weet, dat se mit hör Lachen un hör leeve Oort in mien Hart rinkropen is. Dat maakt ok'n düster Daag 'n bietje lekkerde. All eure Dinge lasst in der Liebe geschehen. All, wat du deist, dat dau van Harten, steiht in't Bibel. Un wenn dat Wurst verkopen is. Of wenn du in d' Autowarkstee arbeitst, in d' School unnerichtst, of wenn du nu net in d' Bus sitzt of in d' Köken an't Tuffels schillen büst. Overall. Tau jede Tied. Mit elk un een. All, all, wat du deist, dat dau van Harten. Dat maakt dat Leven lekker un de Himmel wiet - för di sülmst un för de annern ok. Ik wull doch bloot Leverwurst - un haar an't Enn vööl mehr in't Körv - un in't Hart.

Freedag, 14. April 2023 - Kiek in d' Himmel-Dag

Wi haarn maal Visit ut Österriek. Dor weer ok so'n jungen Frauminschke bi, de was noch nooit tau hör Bargen ruutkomen - un nu was se hier, in Oost-freesland, net so platt as lang. Ik seh hör noch vör mi in hör Sömmerkleed up bloot Foten. Wat is dat hier mooi - sä se in hör Dialekt. Hier is de Himmel so groot. De Himmel so groot ... Vandaag is de 14.April. Dat ist de "Schau in den Himmel - Tag". Hest du vandaag al in d' Himmel keken? Disse Dag seggt di: Kiek mal woranners hen as bloot up de Bargen um di tau, de Barg van Wasch, de Barg van Sörge, de Barg van Arbeit. Hier is de Himmel so groot! Ok för di. Gah nah buten, kiek nah boven. Wat dor all loos is. Dor flüggt 'n Flugzeug, dor trekken de Wolken, dor schient de Sün. Un noch wieder weg, dor sünd de Steerns un de schwarte Lokken, dat wiede Weltall, dat is all dor, ok wenn du dat neet sehn kannst. Ik kiek in d' Himmel – un denn worden de Bargen um mi tau lüttjeder. Denn stah ik neet mehr bloot in d' Schaar. Denn rieten ok de düster Wolken in mi open un ik ahn, dat dat dor achter de Wolken un achter dat Weltall noch wat anners giff, wat groter is as all dat, wat wi sehnt un begriepen können. Wann reißt der Himmel auf? - De Musikgrupp Silbermond fraggt sük dat. Wenn du bi dat Lied, dat wi nu höörn, in d' Himmel kieken kannst, denn dau dat. Dat du weer markst, dat dat neet bloot Bargen giff in dien Leven.